

**Atham wApuccuc
Atham ammakka oPoluc
pokurrinet ul wonoka'ran
kApuccuc
Lon lonothon**

Ka'ran kApuccuc kokat kriik nocarkan na acingki orungko nocapu icoccot k'ran inenni itti Thurkkia. OPoluc pikkot cik than ana ere lon iloporot loIeccuo than luput l'rapuruk ana ul wopot womakathe oMiccie noka'ran ken ana a'ran iokat cik cinang (Ku'rathal 19). Ana noma'ri motte akka kwokat ikorrkkor noka'ran koRoma, kwokurranthet kin atham enni akwokenekin tat akka thocokot lon nomikit then iaMiccie thokat nti ilon lothonekket lon cik loKapik itti oMiccie ponu itti kwaka Ili wolon appik nocapu ana tothi'rot.

OPoluc peret kicce tat akka Kapik kakkarot ul wung ako'ret kin. Nti ilon len ilokithak nthonakin tothun okin oIeccuo oMiccie nthio thung ana thuroko (Ku'rathal 1-3). Ana kwangkene ul iocokothe lon loMiccie itti wikkoik tat ammakka ul iaik tothun okin oMiccie (Ku'rathal 4-6).

¹ Lon elli naun oPoluc pul pothothilettat poMiccie oIeccuo ammakka Kapik kongothe, mpaik pakurrine ul iupupure woKapik iaik noka'ran kApuccuc iocokothe lon loMiccie oIeccuo. ² Athoporot ana thomicco noKapik oNgappa ponnon ana nalli oIeccuo oMiccie oka nanon.

Thethiëttat cik naMiccie

³ Athopira noka oka noKapik ana oNgappa poIli oIeccuo oMiccie, okkwi ipethiet ton nthethieko appik thoKanang ikupupure korothi'rot iaMiccie, ⁴ akka nthongarot thung kwocumot ton nti iul ngk'ran kung acapu ncik appik carthuk oku'retta cik itti aron oka thupupure ana thella thorukettat cik tokit kung ⁵ Akka Kapik kopirat noka ana kongothe, conat lon itti kathikkieron nyukul nyung oIeccuo oMiccie ngngin. ⁶ Ittina oron thapirane Kapik noka nti ithrik thung ana thoporot itha kwethet ton nuthuk ikkul wung ia kwongothe. ⁷ Kapik kapa'rthan pothoporot ilen akka oMiccie pokerinet ton ngüccük ngung ana occikinthet ton lon lonnon ilokithak. ⁸ Kwethet ton thoporot thung thoppot ana thinaik nti ica appik ana thina lon. ⁹ Kapik kittinet ton lon lung ilamu'ruttakot ncik loMiccie, lon ilonu itti lathothakka ammakka thongat thung itha kwongothe iaMiccie. ¹⁰ Lon ila kwonekketheik laik itti kwamartto itti amma ma'ri mocothakothe kwa'rntot a'rupu wonocapu appik ana worothi'rot ikkun woMiccie. ¹¹ Oron thummuntat appik ngk'ran kung, ammakka kwonat lon ica loMiccie itti kwakkot lon appik ammakka kwongothe. ¹² Ittina ton opirane Kapik noka ana ethok thrük akka oron thocittokit ithonekkethe mikit naMiccie. ¹³ Onon cakuruk thothakkat ul woMiccie nci ammakka onon thocikothe lon ilaik icat iloporot loIeccuo lotho'rettat thang. Kapik kokkotho kurret nanon ngKanang ikupupure ikonekkettantheit ton cik

onon ithoccoke the lon loMiccie. ¹⁴ Kanang ikupupure kakene itti Kapik kapakket ton na'rupu ia kwonekkenthet ton lon cik ngngin puccuk aKapik okerat ton aron othakka ul wung. Kwokkothe elli othakka itti aron opiranok noka ana ethok thr̄ik.

Nga'rama ngoPoluc

¹⁵ Manakka mpocckithe lon lothocokot tholon lolli oIeccuo nomik̄it mon ana thongat ithanon thongothe ul appik iupupure woKapik, ¹⁶ mpakorronno oco'rat nti ithopirane Kapik noka ana okwarttikot non ia'rama ngin. ¹⁷ Mpicca pipitto itti aKapik kolli oIeccuo oMiccie oththan ponnon iprik̄ ethet non Kanang kothina cik nti ica ana thittako tholon ncik othakka itti anon inak kicce. ¹⁸ Mpa'ra nga'rama cakuruk itti angathe're ngon anyo animma k'ran ikacco othakka itti annina itti tho'rik̄ot cik thiatha itha kwakkarotheron ana tha'rthan ithrik̄ itha kwonekkenthet non cik itti nthapakkot nan anoul ipupupure wung, ¹⁹ ana pu'ran iprik̄ ipella pangken cik ipa kwethet ton ithoccoke the lon loIeccuo. Pu'ran pen pikkoik ere ipa kwaik pareko ngngin, ²⁰ ipurokiet oMiccie nti ithio apikkiekathok cik noprrok pothrik̄ thokkun wothothari tothi'rot. ²¹ Kapik konu lon ikkun appik antoka manna nili ana pu'ran ana ul w'rek ana okorronno oka noluput elli tulluk ana manna noluput ilanthen cakuruk. ²² Ana Kapik konekkekathe a'rupu iracok toMiccie appik ana kothikkiekathok ca ca'rupu appik conupan noKapik ikkoik noporot. ²³ Ana tupan toKapik takakung, ana iren lon ncik appik loMiccie ana

kwakkot lon ncik appik ook iponu lon ikkun appik.

2

Thikkoik iaMiccie

¹ Ana nanon, onon thokat thillethe ithokkot lon lon ila moloko ana nti ilon lon ilokithak, ² ilanon thokat tit akka nthommakotho lon lonocapu ncik appik ana lopul pothopulut ili wocik corithi'rot ana kanang iakorronno ul a'ra lon loKapik.

³ Oron appik cakuruk thikkot cik iakin aron ommakot lon ilokithak ana lon ila ka konnon kongotho. Ammakka ul w'rek, ana ammakka lon laik, oron thonu itti oron thuako ka ken ngKapik ammakka kuat ka kopilingon.

⁴ Anaruk nti ithongat kannan itha kwon-gotheron, Kapik okkwi ipapa'rthan pothiak, ⁵ pokkiet ton cik oMiccie nngin ana manna akka oron thokat thillethe ithokkot lon ilam-oloko, onon tho'rettathe nthoporot thung. ⁶ Ana Kapik kurokiet ton oron oMiccie ana kwikkiet ton cik aththut na'ran tothi'rot iaMiccie oIeccuo, ⁷ othakka itti noluput ilanthen kwakeneron tha'rthan thothoporot thung ithella pangken cik itha kwokkinthet ton ithongat thoMiccie oIeccuo.

⁸ Akka onon tho'rettathe nti ithoporot nthocokot lon nocikit. Ana lon len lakannoka nanon, Kapik kethet non nuthuk, ⁹ ana okorronno oka nngngre othakka itti akka apilin manna appipot ka thoura. ¹⁰ Akka oron ithokkattathe nyaun nyoKapik ithoku'rettat ncik iaMiccie oIeccuo aron okkot lon iloporot ila Kapik konekkenthet ton cik nci ma'rot.

Oron thulukku iaMiccie

¹¹ Ittina nokwarttikot itti onon ithokat thakorronno okwonta ul woIouth ana nthokat anomettat itti “okin thakannoekkot” okkwion ngngin ithamet ka ken itti “okin ithoekkothe”

¹² nokwarttikot itti ca'ri cen onon thokat ciththan nti iccik koMiccie, ana nthokat thakorronnoka ul woIccereil ana nthokat thellat ithonekket lon cik thoKapik, nthellat tho'rikot cik ana nthellat Kapik cik nocapu ncik appik. ¹³ Anaruk inenni iaMiccie oIeccuo, onon ithokat ciththan nti iccik koMiccie thonakattat napuththut ngngüccük ngoMiccie.

¹⁴ Akka oMiccie ngka kung pathomicco thonon, kwothikkiet ul iannoka woIouth ana ul woIouth thulukku ana kwopa'ret lon cik ilapetto iul, ¹⁵ kwopa'ret lon lothonce'ret lon cik loMucca ana lon ilonthomat ilattul nthio thung. Lon ila kwonat ica itti akwothikkiene ka kung ul wulukku iie nti iul enni aure'ra nthopakket kin iku'ri aththuththe'ra akin othakka ul ionyi iie, ¹⁶ ana thopakkot iku'ri then itti aul ionyi opakot iku'ri okin oKapik nthapak na lon ilaikine thopakkot iku'ri lokkuttathe. ¹⁷ Kwaat ana kwongkenekathenon lon iloporot loKapik onon ithaththokat ciththan nti iccik kung ana ongene okkwion lon lothomicco ithokat iccik kung. ¹⁸ Akka nti iaak oron appik thiot kathar ikaron oine oThthan ngngin ngKanang kulukku.

¹⁹ Ittina, onon thakannoka ana ul wokwat, anaruk ul wonoththok nul woKapik iupupure appik ana ul woruan thanung. ²⁰ Nuno nomillang moul wothothilettat woIeccuo ana ul wothernte lon loKapik, aIeccuo oka cillang coman ana

mothok imunta ngngin. ²¹ Man moccokarothē appik iaak ana maku'rot amothakkakat tupan toKapik irupupure illi. ²² Ana iaak onon cakuruk thuntathe ithun anon othakka ka'ran na Kapik ikkoik ngKanang kung.

3

OPoluc pul ipangkene ul iakannoka woIouth

¹ Nti ilon elli, oun oPoluc ipapul porikor-rkkor poMiccie oIeccuo othakka itti anongkenenon ithakonnoka ul woIouth. ² İcat, onon thocçikothe itti Kapik kethin thoporot thung anongkenenon, ³ ana ilen lon ilamu'ruttakot ncik ana littakinin ncik ithathantako thothitto lon loKapik ammakka mpokurrinet non nan lotte. ⁴ Ana amma onon akkakkaro lon elli ila mpaik pathinthe non, onon thina thinaik thin tholon ilamu'ruttakot ncik loMiccie, ⁵ ilokat lakinnittakine ul w'rek ncik nci ma'rot ammakka littakininet thiki enthi ncik inenni thothothilettat woKapik ithupupure ana ul wothernte lon loKapik ngKanang koKapik. ⁶ Lon ilamu'ruttakot ncik lonu itti llon, iloporot loKapik, ul iakannoka woIouth wapakkot na'rupu nul woIccereil ana okin thaka ithun ika kulukku ana okin thonu itti okin thacco lon ilonekkettatheik ilanthe iaMiccie oIeccuo.

⁷ Mpothakkat pul iparekine lon iloporot loKapik nthoporot thoKapik itha kwethin nuthuk nthoreko thopu'ran pung. ⁸ Antoka manna itti mpokat potteik kannan ithocçokot lon loKapik nociküt nti iul appik iocçokothē lon loKapik anaruk Kapik kethin thoporot enthi

itti anongkene ul iakannoka woIouth tha'rthan ithaik iaMiccie ithakorronno omattat, ⁹ ana itti anokene ul appik lon ilamu'ruttakot ncik thupuththuput iKapik ikoku'ret a'rupu ncik appik. ¹⁰ Ila konat ica itti aul ioccoke lon loIeccuo inie nili nan ana ul ionu lon ikkun na'ran tothi'rot thinaik nti ica thoKapik appik, ¹¹ ammakka ila Kapik konu ica lothupuththuput ana ila kwocotho the iaMiccie oIeccuo Ili wonnon. ¹² Ana iaak ana nthocokot tholon lung nomikit, oron thaine Kapik ella n're. ¹³ Ana ittina mpipittot non itti nokorronno apo ka ntit nti ithiak itha mpaik paccokot nti ianon akka thanane non thrik.

Tha'rane ul wApuccuc nga'rama

¹⁴ Nti ilon elli mpee ungu ncik tokit koN-gappa, ¹⁵ na ku'ri kung appik korothi'rot ana nocapu occietta k'ran ngngin. ¹⁶ Ana mpa'ra nga'rama itti notha'rthan thothrik thung akwopo'rie mikit mon than mpu'ran poKang kung, ¹⁷ othakka itti aMiccie ikkoik nomikit mon nthocokot tholon loKapik nomikit mon. Ana mpa'ra nga'rama itti athongarot thon occokot cik nomikit mon ana opo'rathan, ¹⁸ athona pu'ran tothun mpu'ran poul iupupure woKapik annina thongarot thoMiccie thape tat ana thukwit tat ana tharat ciki icarak than. ¹⁹ Othakka itti annina thongarot thoMiccie itharrothe thinaik cik appik, othakka itti athikkoik thon othakka ammakka Kapik kongothe itti onon thaka.

²⁰ Laine Kapik appik ikokkothe lon loppot ilakanekkietta nolon ilaron ipitto ana ilaron thellat ima itti lakaik mpu'ran pung ipaik pareko

iaron. ²¹ Athrik oka naak iul iocckothe lon loJec-cuo ana iaMiccie oIeccuo ana ithiki ithanthan appik thupuththuput. Amin.

4

Thoka thulukku ika koMiccie

¹ Ammakka pul porikorrkkor polli, mpi'ret non itti onon thikkoik thikkoik ithakene itti Kapik kakkarot non. ² Nokorronno ipot ka thoura, noka thoporot ana occokot mikit ilon ana oco'rarot nthongarot. ³ Nopo'rathan Notho'rumo thothoka thoKanang tothun nthikkoik thoporot. ⁴ Ka kaik kulukku ana Kanang kulukku ammakka onon thakkarakotho tho'rikot oMiccie thulukku ca'ri ica onon thakkarakot. ⁵ Ili waik wulukku ana thocckot lon nocikit thulukku ana mamuthie mulukku, ⁶ Kapik kulukku ana oththan poul appik iprik naron appik ana kareko iaron appik ana kaik iaron appik.

⁷ Anaruk oron thocckot thoporot kurekkurek ammakka oMiccie pillilinet ton tit. ⁸ Ilen akka li'renet itti,

“Akka kwoku'rothe kapik,

kwonekot ul woppot ia kwoccicckothe

ana kwikkekathe ul a'rupu wothethet
nuthuk.”

⁹ (Ngintha akkonu itti “kwoku'rothe tokapik” lonu itti kuot ciththothirin kappak akwan-toku'rot tokapik? ¹⁰ ana ook ipuot thothirin ook pen ipoku'rothe ci to'ra worothi'rot appik akwoppat cik appik.) ¹¹ Ook ipethet ul lon itti opilingon thathakka ul iangkene woIeccuo oMiccie ana opilingon othakka ul wothernte lon

loKapik ana opilingon ithangkene ul lon ioloprot loKapik ana ul wonoppan toKapik ana opilingon ul iangkene, ¹² othakka itti aul okuccekot cik woKapik iareko ngre ngung, othakka itti aul ioccoothe lon loMiccie ina lon lung kicce ana oka woppot. ¹³ Ittina aron appik okakat tothun thulukku ithocokot lon lung nomiküt ana ina ukul woKapik ana oron ocokka iaak llon aron arppithakat oron oMiccie ana othakka ammakka ook kirrkir. ¹⁴ Ittina oron thakanoka ammakka nyukul inyarran, inyalon oprtto ere thopangka thoi're ana lon lothongkene thoul ngkarra aukkukkot ere kanang amma akokkurarot cik akin urttakat cik. ¹⁵ Anaruk, ntrun ere lon ilaik icat nthongarot aron ocokkat iaak llon appik ook oMiccie ipaca coka. ¹⁶ Kwocurttariethe ka ncik appik tothun, ana amma ka ikocurttariettathe orekot tothun, ittina kaik kittarot ka akocokka ithongarot.

Thikkoik ithie thoMiccie

¹⁷ Ittina mpi'ret non elli ngk'ran kolli, itti nokorronno ikkoik karkko ul iakannoka woIouth akka thokwarattikot cik then thella lon cik. ¹⁸ Nyathe're nyen nyaik i'rimak ana nyomma ina lon ana okin thaik ciththan nti ithikkoik thoKapik nti ithommaik ithaik iakin ana thonthoma ma then. ¹⁹ Anakka okin thellat miküt ikarak, okin thikkatheik akin okkot lon lulluk lonamat ila ka ken kongothe akin okorronno omana.

²⁰ Anaruk onon thammatt oMiccie ngkathar engki ²¹ onon thocckothe lon loMiccie ana onon thongkenettat lon lung ilulukku llon ilaik icat ilaik iaIeccuo ²² nokorronno kathar kothikkoik

thon ithanon thokat tit tokit ana opa'rine lon cik ilipe ilokat lokittakot llon lothongat a'rupu ilokat ngkarra.

²³ Anyath're nyon ana Kanang othakka thie ²⁴ nikkoik thikkoik ithie, itha Kapik kokkothe ithaik icat annothakka ere Kapik nthikkoik thoporot ana thupupure.

²⁵ Ittina nopa'rine karra cik annerene ul wonocuruk cang lon ilaik icat akka oron thoka kulukku. ²⁶ "Ana amma onon thuarot ka ken nokorronno okkot lon ilokithak" nokorronno okorronno itti cingki carungkwo anon tharthuk thuaro ka ken ²⁷ nokorronno ethet pul pothopulut ka'ran. ²⁸ Okkwi ipokat cik akwomunye akwokorronno thu'ran, anaruk, kwonu itti kwareko nynyaun nyung akwina akka akwitarot okkwion ithella a'rupu cik. ²⁹ Nokorronno oppiet lon thapat ilokithak nti ithon thon, anaruk lon lulluk iloporot ilittarot ul aupokko llon ilakin thonu itti okin thupokko ngngin ana alinakiet okkwion ithaik thaccikot. ³⁰ Nokorronno uet Kanang ikupupure koKapik ka cik, ikanon thone-mittathe ngngin anno'rikot ca'ri cothopakkettat. ³¹ Nopa'rine lon loth'raro nomikit ana the'retto mpo're cittan ana thua ka ana thocungkaro ana lon appik ilokithak. ³² Nongarot ana iparo thiak then appik, ana occikarnthet lon ammakka Kapik koccikinthe non lon nti ilon loMiccie.

5

Kathar kothikkoik thoporot

¹ Ninikot Kapik ammakka nyukul nyung ingyongakothe. ² Nikkoik thikkoik ithonu thongarot

ammakka oMiccie pongatheron ana kwangkathe itti kwio nti ilon lonnon ere amutha ana papu pothokiot ngüccük poKapik.

³ Anaruk nthonu itti nthakorronno a'raro nngin nuthuk ana thrïk nan ana namat, akka lonu itti lakorronno oka ianon akka lakorronnoka loporot noul iupupure woKapik. ⁴ Nokorronno ere lon ilokithak ana lon ilella lon cik ana ngure iokithak iakannoka ngoporot anaruk nopirane Kapik noka. ⁵ Akka onon thina kicce itti pul ipa'ro nul nuthuk ana a'ro mpangken alla pul ionu thrïk nan, pul ammakka empi ponekkethe cikït na'rupu woka noKapik ana pakorronno opakot nolli ngoMiccie ana ngoKapik.

⁶ Nokorronno okorronno itti opilin pammikkot non llon lella lon cik, akka thua ka thoKapik thaine ul wen iakorronno occïkot lon loKapik. ⁷ Ittina nokorronno oka ithun naththungon.

⁸ Akka onon thaththokat i'rïmak ca'ri c'rek, ana inenni onon thothakkat k'ran ïlli. Ittina nikkoik ammakka nyukul nyok'ran. ⁹ (akka lon ilanthan nok'ran lathoprot appik ncik ammakka itti thikkoik thoporot tokït koKapik ana lon ilaik ïcat) ¹⁰ ana thakwancot lon ilapirie Ili noka. ¹¹ Nokorronno oka ithun llon lori'rïmak ilella lon cik, anaruk okene itti lokithak tat. ¹² Akka lon ila ul iakorronno occïkot lon okkot nthu'ran lothiettot cik itti langanta. ¹³ Anaruk a'rupu appik iak'ranocco nan wimmako attattar ¹⁴ akka k'ran akkakorronno lon alimmako attattar. Ilen akka li'rettanet itti,
 “Uroki nti inthe okkwi ipaik inthe,
 uroki nti ithio,
 ana k'ran koMiccie kacco naung.”

¹⁵ No'rumo nothikkoik thon papenang noko-
rronno ikkoik ammakka ul iommaik nti ima
anaruk nikkoik ammakka ul inaik nti ima,
¹⁶ nokorronno ikkoik nuthuk, nokkot lon l'rek
noca'ri icanon thaik nan akka ma'ri emmi
mokithak. ¹⁷ Ittina nokorronno oka thommaik
nti ima anaruk nina lon ila Ili wongothe itti onon
thakkot.

¹⁸ Nokorronno okorronno itti ngapak
ngakkwot non akka ngakorronno non annokkot
lon lokithak kannan, anaruk nokorronno Kanang
akoppappat ianon. ¹⁹ Nerettarne llon nti
iatham woMocumur, ana unye wothopirie
Kapik noka ana unye iaKanang ikupupure
ethettot. Nongwina Ili ana opirane noka nci
nocikit. ²⁰ Nopirane Kapik noka oNgappa nti
ilon appik appinappin ngk'ran kolli wonnon
oIeccuo oMiccie.

²¹ Noccikarot nthothiak thoMiccie.

Ul iari ana ollen

²² Ul iari nothiane olle pangon cik ammakka
anothiane Ili cik. ²³ Akka pul ipocura paca copari
pung ammakka oMiccie paca coul ioccoke
loIeccuo ia ka kung ana ook ipa Tho'ret then.
²⁴ Ana ammakka ul ioccoke lon loIeccuo
wathiane oMiccie cik ul cakuruk iari ittat wonu
itti wathiane ollen cik llon appik.

²⁵ 'Re, nongat ari won ammakka oMiccie pon-
gathe ul ioccoke lon loIeccuo mono akwiat
nti ilon len ²⁶ othakka itti akwothikkie tupupure,
ana ime ngng'ri ialon, ²⁷ kwokke the ittina ak-
wothikkiene ka kung ul ioccoke lon loIeccuo
wollio wella ngu'ru nan ana orthin nan ana
lon ilokithak ana kupupure ilaa thurikettacik

thorukwettat llon. ²⁸ Ana cakuruk ul iomura wonu itti wangat ari wen ammakka wongothē ka ken. Okkwi ipongothē opari pung, kwongothē ka kung. ²⁹ Ittina pul pella ip'ra ka kung anaruk kwa'rumo nan kicce ana o'rikie thu'rit ammakka oMiccie okkinthet ul ioccoothē lon loleccuo ³⁰ akka oron thono ka kung. ³¹ Ammakka atham wi'ret itti, “Ittina ilen akka pul ipocura oththene naththan ana onnan apokattakot okin opari akin othakka aththuththe'ra ka kulukku.” ³² Lon elli ilamu'ruttakot ncik ilrik anganna, anaruk mpaik peret oMiccie ana ul ioccoothē lon loleccuo. ³³ Ittina, ngkwonu itti ngkwangat pari pang ammakka ngkwongothē ka kang ana pul ipopari ponu itti pathiane olle cik.

6

Nyukul ana oththangon

¹ Nyukul, noccikot oththen akka Ili akki'ret, akka loco'rotheik menik. ² “Nothiane oththe cik ana onne” Akka lon len akkaik prek nolon ilattul ilonu thonekket lon cik tit, ³ “itti alon okanung loporot ana itti aikkoik nocapu luput loppot.” ⁴ Ana mpi'ret oththangon itti, nokorronno uet nyukul ka cik, anaruk nupotho kin nthongkenekin ana ocimitto kin llon ila Ili wongothē.

Iak ana opingon

⁵ Iak, noccikot opit pangon thonocapu nthothiaik ana n're, ana nciküt cella karra ammakka annoccikot oMiccie. ⁶ Noccikot kin okorronno oka tulluk itti annopiriekkin noka akka okin thaik thakathaccenon, anaruk noreko ammakka iak

woMiccie iaik wakkot lon ila Kapik kongothe nomik̄it mon. ⁷ Nokkot ngre ncik̄it culukku ere ngkwaik parekine Ili ana okorronno oka ul ionyi, ⁸ akka onon thina itti Ili wakke ul kurekkurek nore ioporot ia kwokkothe antoka manna itti kwapiak ana manna itti kwannoka papiak. ⁹ Ana op̄ingon, nokkinthet kin lon ammakka okin okkinthet non, nokorronno ipiekin n're, akka onon thina itti onon appik thonu opit pon pulukku paik tothi'rot ana ittina lella itti pul pella ioporot napang tokit kung.

Kamarang koKapik

¹⁰ Ittina p'rin, mpi'ret non itti nopo'ra than ilon loIli ana ipu'ran pung iprik̄ ipakannalkakot. ¹¹ Nako amarang woKapik appik othakka itti annina akka annorro ilon lopul pothopulut appik. ¹² Akka tho'rak thonnon thakannoka iul ionyi anaruk inili ana ingili ana ipu'ran pocapu enci icaik i'r̄imak ana iul irro iau'rupa iokithak iaik na'ran worokapik. ¹³ Ittina nako amarang woKapik appik, othakka itti amma ca'ri icokithak caat, aina akka arro itho'rak thang ana amma ngkwakot a'rupu appik ngkwa'rungkwot cik ponthomat. ¹⁴ Ittina nothipoik kiththik, ngku'rat ik̄in kolon ilaik icat, ana ngkamarang koropere kolon iloporot tokit koKapik, ¹⁵ ana ako wok akuccekot cik atherene ul lon iloporot lothomicco. ¹⁶ Ana llon elli appik, nako kamarang koropere ikonu itti thocokot lon nomik̄it angwo mopok molik mopul pothopulut. ¹⁷ Nako nyumurra nyorima inyonu itti tho'rettat anekat k'rittang ikukwit koKangang

ikonu itti lon loKapik. ¹⁸ Ana na'ra nga'rama appinappin ngKanang nolon appik ilannipitto kurekkurek. Ilon elli ima nokorronno ikkoik ithuman no'runkot nan a'rane ul ipupupre woKapik nga'rama appik. ¹⁹ Na'ranin nga'rama cakuruk othakka itti amma ananyo thon itti anere alon ettathin anokene lon ilamu'ruttakot ncik iloporot loKapik ella n're ²⁰ ittina mpaik inyol ana icci mpaik pangkene lon loKapik ammakka pul ipothilathe poKapik. Ittina na'ranin nga'rama othakka itti ano'rungkwot nan ere lon lung ella n're ammakka mponu itti mpaka.

Thomicco ithacothot

²¹ Opangkin oThikikkoc ipa mpongothe ana ipo'rumot nore ngoIli perenenon lon appik, othakka itti anon ina cakuruk itti mparat ana ngimpen akka mpaik pakkot. ²² Mpaik pathinthet non ngok nti ilon len othakka itti annina itti onin tharat ana othakka itti akwittarot non. ²³ Athomicco oka napangkingon, ana thongarot nthocokot lon nomikit noKapik oNgappa ana Ili oIeccuo oMiccie. ²⁴ Athoporot oka nakkwion ithongothe Ili wonnon oIeccuo oMiccie thongat ithakannomattat aththik.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.
All rights reserved.

2020-11-18

PDF generated using Haiola and XeLaTeX on 23 Aug 2023 from source
files dated 29 Jan 2022

b9cb69ce-3694-5d9f-bda5-4a2243fae